



MILIŠIĆ (Ivana) ANTUN, dipl.inž.geod.

Rođen je 20.11.1911.godine u Sarajevu, u radničkoj porodici, kao prvo od petero djece. Školovanje je započeo u Sarajevu gdje je završio osnovnu školu, šest razreda gimnazije i prvi razred Geodetske tehničke škole. Završni, drugi razred geodetske tehničke škole i diplomski ispit završio je u Beogradu 1932.godine. Školske 1947/48 upisao se kao vanredni student na Geodetski odsjek Tehničkog fakulteta u Zagrebu, gdje je diplomirao 1954.godine.

Školu rezervnih artiljerijskih oficira završio je 1934/35. u Sarajevu, a kurs topografskog oficira 1935. u Kalinoviku.

U periodu od 1932. do početka II svjetskog rata radio je kao geometar u Ministarstvu finansija - Odjeljenje katastra i državnih dobara na tzv. novom premjeru i to tri sezone na vangradskim područjima, a ostalo vrijeme na premjeravanjima gradova Sarajevo, Beograd, Negotin Subotica i Travnik.

Za vrijeme okupacije 1941-45. radio je na poslovima katastra i novoga premjera te na poslovima kolonizacije. U istom periodu bio je mobilisan u domobranstvo, gdje je radio kao adutant u artiljeriji. U tome zvanju a u aprilu 1943. počeo je saradivati sa NOP-om i saradnju nastavio do kraja rata.

Poslije oslobođenja bio je mjesec dana nastavnik na kursu komandira XXIII divizije u Sarajevu, a odatle je na traženje ZUND-a BiH demobilisan i nastavio sa radom na administrativnim poslovima u ZUND-u BiH. Od 1946. opet je nastavio raditi stručne poslove, pa je tako dodijeljen za nastavnika na Geodetsku tehničku školu u Sarajevu, gdje je radio do 1950.

Od 1950. do 1957. radio je najprije kao v.d. asistenta a kasnije kao asistent na Šumarskom fakultetu u Sarajevu na predmetu Geodezija. Od 1957. do 1960. ponovo radi kao profesor Geodetske tehničke škole u Sarajevu, a po osnutku Više geodetske škole u Sarajevu septembra 1960. izabran je za profesora. Na višoj školi radi do njenog ukidanja 1974.godine kada je po svojoj želji penzionisan. Od 1968. do 1974. bio je izabran i radio kao direktor Više geodetske škole.

U međuvremenu radio je na teorijsko praktičnim zadacima u

privredi mahom iz primijenjene ili tzv. inženjerske geodezije i na oskultacijama velikih građevinskih objekata kao što su: brane, rudne žičare, rudne uspinjače i spuštaljke, rudna područja koja su u eksploataciji i za takve objekte izradio je nekoliko projekata za izvođenje oskultacija i odgovarajuću obradu podataka.

Na poslovima trasiranja izradio je geodetske podloge za tri žičare, a sa grupom kolega izradio je projekat rekonstrukcije puta dužine 19 km. od Sjenčina do Mostarskog polja.

Na ostalim važnijim poslovima izradio je jedan dio profila za praćenje zamuljivanja Jablaničkog jezera, geodetske podloge za regulaciju dijela rijeke Bosne kod Doboja, geodetske podloge za melioraciju Tešanjskog polja, te više geodetskih podloga za razna projektovanja u poljoprivredi.

U svom dugom radnom vijeku predavao je mnogim generacijama đaka i studenata, saradivao sa velikim radnim kolektivima kao što je Energoinvest, Hidrogradnja i drugi, bio je savjetnik, sudski vještak i jedan od cijenjenih geodetskih stručnjaka u Bosni i Hercegovini.

Bio je dugogodišnji član DIT-a, sekretar AKD "Napredak" od 1945 pa do ukidanja, predsjednik dzudo kluba "Bosna".

Umro je 22.11.1993. godine u Sarajevskoj bolnici Koševo, nakon operacije noge slomljene u kuku, a sahranjen je 24.11.1993. na groblju Svetog Josipa u Sarajevu.

Faruk Filipović